

Nepoštivanje vladavine prava ugrožava državnost BiH

Visoki predstavnik Paddy Ashdown je danas upozorio da neusaglašavanje zakona o osnovnom i srednjem obrazovanju u nekim kantonima predstavlja nepoštivanje vladavine prava te da to indirektno ugrožava samu državnost BiH.

Prošle godine su HDZ i SDA glasali za Zakon o osnovnom i srednjem obrazovanju na državnom nivou koji je zatim jednoglasno usvojen u Parlamentarnoj skupštini BiH. Od kraja prošle godine je u kantonima 2, 6, 7, 8 i 10 zabilježen dosljedan izostanak podrške usaglašavanju kantonalnog zakona sa zakonom na državnom nivou.

“Taj propust da se kantonalni zakoni usaglaise sa zakonom na državnom nivou predstavlja ozbiljno nepoštivanje vladavine prava” rekao je visoki predstavnik. “Ukoliko odgovorni za ovaj proces hitno ne riješe ovo pitanje i ne pruže podršku zakonima države Bosne i Hercegovine, oni u stvari ugrožavaju samu državnost BiH. HDZ i SDA u kantonu 7 sada su direktno odgovorni da do toga ne dođe. Sada kada je federalni Ustavni sud iz proceduralnih razloga odbacio prijavu u kojoj se HDZ poziva na vitalni nacionalni interes, više nemaju izgovora za nepoštivanje vladavine prava. Ovo je suviše ozbiljno pitanje da bi se dozvolilo dodatno odugovlačenje.”

Visoki predstavnik je rekao da će OHR, ukoliko se do petka, 4. juna, ne poduzmu koraci u cilju usaglašavanja kantonalnih sa državnim zakonom, kazniti stranke i pojedince odgovorne za opstrukciju, počevši sa novčanim kaznama.